

艸亭先生集

艸亭先生詩集卷一

吳江周篆籀書著

後學翁廣平海邨編輯

門下後學俞鍾嶽覺齋校刊

古體詩

飛蓬

飛蓬本有根何苦如遊子雖無天畔行隨風亦幾里不  
若爲女蘿攀援松柏起蒙茸高入雲嶽不安敢比物性  
自有常依附所深恥秋風動地來飄飄固其理

駑駘四首

駑駘導騏驥藏拙入湫隘側足示從容掣電使知戒跼

山陰之詩集 卷一  
踏不勝愁回頭欲裂眦恐爲伯樂聞長鳴致吁怪安得  
任翦拂所遇必聾聵

聾聵安可期執鞭遇廝養亦惡追風足過都只一響忽  
粟不能招目無千里廣康莊恐復然絆足繫其鞅材能  
無所施驚駘漫惚恍

伯樂旣千古善相復爲誰翹足待知已無乃未有期風  
塵具遠識馭馬亦怒之品題一出口終世分妍媸藻鑑  
尙取忌汗血何可爲

汗血雖見輕倜儻志尙在骨骼苟無恙奴隸安足罪責  
以空羣識事已隔山海侯家錦繡鞍知有五文采苟興

牛共阜瘠死弗言餒

枉渚

枉渚避風宿，遑復知其名。  
水次固無主，繫艇何須爭。  
揚帆載大賈，舟子有餘榮。  
去汝泊木末，我更形神清。  
行侶亦有類，方音難具明。  
大約鳧鷖伴，多半傷勞生。  
君聽柁樓底，終夜挑罾聲。  
自非忘機客，隨地必有營。

客來三首

客來呀斯哈，爲我言北斗。  
杓曲不成柄，魁方亦異口。  
喉舌憶中華，清宵立馬久。  
豈非地軸偏，天文亦隨走。  
此說古無傳，測理非烏有。  
譬如遠望山，移步改峯阜。  
況從絕

域看度數誰能剖斗南固有人北豈無黔首立言貴有  
徵周智病拘守事在六合間將毋亦寘否

自注呀斯哈  
遠尼厄勒蘇

地名

客從艾渾來爲我言日晷夜短苦晝長令人錯臥起三  
餐尙苦飢況不足糠粃那還秉燭遊雲山已萬里嚴冬  
一朦朧盛夏只彈指如何夢故鄉夢亦無終始自古有  
徹宵纔熟羊胛耳不見日觀峯日出雞鳴裏須知此一  
方側近羲和軌昧谷閃餘映餘暉亦如此

自注艾渾地  
名在黑龍江

自愧好游覽不出疆域中往返止萬里安得不大同幾

度遼海右經年粵嶺東絺以遇窮臘裘以當薰風取我  
歷氣候推君言蒼穹雖似窺管豹敢類聞冰蟲豈無南  
望斗萬古天朦朧自注極北有不見日月之所若將銖黍識推測安  
能窮仙人排閭闔隱士棲崆峒寧堪兩孤負苦被乾坤  
籠

月魄三首

光少魄何顯光多魄何微光魄不兩立皆因旋如璣光  
初在魄背四散流清輝固宜如明鏡如貼青天飛欲弦  
魄豈失魄往光來歸有如魄瘦削讓與光充肥我欲補  
天官但愁知者希區區抱獨見立說何因依

昔人謂初月如丸堊其半從極遙睨之光有一線爛稍  
稍轉向人得不加昭煥此言既有徵舉目復可按君看  
上下弦未昏及初旦晶瑩輪邊光與天煥然判弦如畫  
遠山漸染入漫漶豈非弦盡處不是光華畔

月中茫昧處人言如目瞳或云山河影似是皆愚蒙月  
瞳何必黑地影當常中況謂搗藥兔及稱丹桂叢月體  
雖如珠曾見誰磨礪其突借日光其切因朦朧談天指

諸掌遠鏡今來東占驗請視此聚訟宜姑終

自注遠鏡出大西洋

以羊皮或粘紙爲筒大小長短其製不一小者如指長  
二三寸大者如臂長一二尺三箭重貫如樂器中喇叭  
令可伸縮寘玻璃于其端而伸之從底注視可見數百  
里日之有角月之有窪太白之有弦望天河之爲積星

皆由此而審若倒視  
之則日月皆小如星

日晷

誰言日東升只可云轉輾假如天體方方有東西辨君  
能循地行地亦未嘗匾試取意戴日從幽周至顯何西  
不成東左旋所以典下土莫大笑我說最易闡若云日  
有角知者更加鮮

熟西北

三吳不薄徵私家何由足公室無積儲薄徵未可卜蓄  
積非無因在生西北穀穀亦豈易生生從棄地熟此絀  
彼不贏彼伸此可縮用意鳩鳩平豐亨如轉轂大驅游

情民終身入檢束非惟益正供亦令實其腹萬古黷  
場魍魎和鬼哭一旦風雨時蓬茅成菽粟取一豈爲貪  
餘九恩已渥何用費不貲舟車遙督促但恐古廢弛攢  
眉或瞋目自非經天才勿蒙千載戮

### 濬溝洫

不溉何用耕無泉安取灌自非濬溝洫經營意徒亂千  
里莽蒼間邈迤平若案豈不任耒耜無以禦潦旱溢須  
地飲乾枯祈天渙汗此實人事乖非關農越畔高引何  
處山低築幾許岸源遠雲漢迴流分絲縷散土生生氣  
奢立苗苗力悍會見青青蒿倏成白白粲非徒實公儲

南紀資襄贊未雨先綢繆在此高下判地勢無山河亦  
畧隋使斷世事偶不然并足資禦捍

### 大風

不稱洞庭風難鼓洞庭浪力作洞庭波始見秋風壯軒  
輊天地勢奔走山岳狀無乃吳越濤上洗越嶲瘴君山  
得自持九嶷莫無恙回首苗蜒窟縣知悉震盪水天勢  
互吞廓落兩無傍如何扁舟客欲得情懷曠

### 農桑二首

芝草雖無根醴泉亦無源藉非資地力焉能行以繁七  
國重游說晉代崇清言廟堂知至理此輩歸衡門故鄉

今布穀春水邛邛喧持以謝千古忘言終灌園  
止水無驚魚風林鮮安鳥奈何柴桑翁羲皇滿懷抱百  
六屆常期造化亦枯槁風雨逼清明忘機何不早吳蠶  
知幾眠山桑青杏杏荷鉏尋舊畦長歌薤芳艸

雨二首

春光澹無姿花鳥半悒快開門見曉天鬱塞不得仰塞  
垣如炎州一望成橐壤忽然煙霧集几案潤于繇始知  
造化心欲使氣蕭爽亭午必聞雷密雨滄林莽凭闌幾  
延竚虛願亦頗廣小可資春耕大乃洗兵仗  
晦冥復晦冥天地如銜冤不有飛電逆誰與舒愁煩震

雷勿過多多恐地軸掀霖雨勿過久久恐滄海翻客子  
適萬里寂寂常閉門豈不急衣食磬折傷精魂顛氣旣  
清寧枯坐忘晨昏夢寐亦迂拙不知卿相尊

黔陽道中雜詩六首

東行愜歸思遲遲棹亦佳歲旱艸木槁亦未如焚柴君  
看葉落處必與長風偕鳴蟬何得所據此山水涯觸目  
起虛想爽塏宜茅齋灘流趁小艇似畏人安排

谿旁斷續山蔽虧西下日野鳥向風鳴遊子掀篷出散  
髮櫛去絲跣足濯到膝浩蕩一開襟除此兩日室篙師  
指焦谿飄零尚有室且得酤濁醪樂事窮途畢

絕技輕下水灘高意頗懈去柁著招槳

自注招施于船頭以轉船者

舟子吁可怪避石不避濤談笑當滂湃  
鱸子幸如鳧浴出崩湍快坦途能覆車  
古人所深戒不如上水船艱苦無傾敗

昔人延食鼈投箸待其長鼈小亦何有聲色俱快快賢

母善溺愛當時幾與杖今我非上賓一嚮固可饗九肋

見方書

自注辰谿產九肋鼈入藥

莫徭竝誇獎

自注莫徭蠻名自言先世有大功不受徭

役故稱

長汝向江湖他年何處網

清風直如弦明月曲如鉤山高不照水林密偏吹舟  
條然拂枕席誰羨封公侯明月一以望涼風將悲秋  
兩美

安得竝月好復何求披襟況有風胸次殊悠悠  
無突安得黔無席何由煥露宿天邊庭野爨山家館坤  
軸寧有涯客遊興忽短出谷歎息停入舟志意滿崖樹  
古宜橫崖石佳偏斷何計使歸途位寘密如纂

甕子洞

水落鐵索高逆浪攀援難揭厲牽百丈憐君衣裳單風  
微不上帆奈此連雲湍我舟已下瀨君行未半灘物理  
了可悟勢逆何可干洶涌自茲始路遠天方寒今君欲  
奚適我將歸考槃前途山勢盡地平天亦寬流水尤寂  
寞止覺秋漫漫

沅江夜泊

沅江藪澤縣浮家汎衣食艸鯉曬網風水赤洗魚色孩  
提挑絲罾丈夫牽麻毀婦女何處居竹篷凌波植豈不  
虞風濤扁舟維在側聞有渡河虎搏攫待昏黑蘆荻晚  
蕭蕭風起不可測臨淵勿羨魚恐與憂虞卽寄語懷璧  
人休輕適楚國

十五夜泛舟抵長沙三首

沅湘空清秋澹蕩尤在夜況當八月望空明豈有價玉  
壺冰過寒銀漢石難借但見出海月淋漓起相逐

長沙淨睥睨南岳開雲煙萬里靜如鏡坐待臨嬋娟遊

子清凄吟不愧金波縣冰輪莫易仄舟楫方翩翩  
橘洲曉露滋浩歌猶未寐嶽麓靄朝暉令我心似醉月  
餘累夜圓秋禪一年位從此菰蘆人思鱸欲返轡

發長沙

少讀屈賈書長沙在天上每欲一遨遊憑弔散悽愴栖  
栖大布衣頗悉窮愁狀靈均苟許可太傅自相諒詩文  
雖末技平生畧悲壯點染沅湘秋千古作和倡往復三  
繫船風流無可傍蘭芷沒蓬蒿鴟鴞鳴相向畱滯亦何  
爲徒失蓴鱸望清風已滿帆一舉破秋漲

江詩

晚雲低且平如城抱江澣  
燈火遞明滅漁舍燦可數  
互答足歌聲維舟快千古  
翳翳落清尊疎星拱挹取  
初冬歸計諧誰敢怨風雨  
積陰過九秋薄晴不猶愈  
計程欲遄發起坐須夜五  
注聽銅官雞回數長沙鼓

遣興

大智莫如亮大奸莫如操  
孰知天定時奸智兩不效  
才術況區區亮操俱莫肖  
營營謂人定可與天爭要  
不爲龍所噬亦爲鬼所笑

擬迢迢牽牛星

高高商東升昏昏參西驟  
忽忽枕干戈明明手左右  
終

古味彝倫天良爲誰囿玉潤與珠圓行列幾許宿皎皎  
共一天邈邈不相就

落梅花

梅花無數落不見一枝開驀地春光早教人客思催凌  
風香碧落繞霧點蒼苔曲罷餘嘹唳羅浮午夢回

關山月

漫道關山月生成帶別離秦時愁裏望漢代淚邊虧能  
照鳴鳩劔高翻赤白旗盡將千古怨譜作凱歌吹

折楊柳

楊柳方凋謝堪君折幾枝若教吹到曉只有鬢如絲蕩

子無歸日佳人  
有恨時還當憑此曲  
滿陌報春知

猛虎行

命虎牧羊虎拜稽首  
誓竭驚鈍唯羊斯阜  
羊前迎虎虎顧而喜  
瘠者徐之肥聊爾爾  
肥既不存瘠亦何有  
羊勿私願虎未虛口  
羊無告訴載號于天  
縛羊畀虎以一虎  
權虎懲羊怒謂羊敗  
德主人曰咨羊之司  
直野無遺羊艸蔓滋  
植謂虎經營豐羊之  
食及時閒暇命工補  
牢歲晚羊歸毋與禍  
遭主人召客有酒盈  
缶虎雖伏罪于羊  
何有

龍蟻行

龍興雲從雷雨交作蟻亟登堆睇得其角或睹一爪一  
髯一鱗目力所及匪神斯神角者曰歧見髯謂直規鱗  
脫爪各逞厥臆蟻訟于穴龍潛于淵莫敢或正見然云  
然

述古五首 并序

述古美許由也許由逃堯宿于逆旅主人忘其皮冠意  
由竊之

堯曰咨由請致天下由曰俞哉庖其祝在言遜言逃復  
我曠野

日之夕矣于旅斯館有煒皮冠匪裁維纂主人求之云

何其罕

豈伊異人于焉假寐會玉星明致貪之器借曰非由其  
誰之意

蒼蒼箕山洋洋潁水巢又伊何言洗其耳微竊之傷惟  
讓之訾

胡讓能傷胡竊能妨爲竊爲讓爲糝爲糠潁水洋洋箕  
山蒼蒼

詠史四首

楚元旣往其志不傳何必忘醴道意斯遷假饒強設要  
非敬賢

綈袍戀戀舉贈孺子旣憐其寒復幸未死豈無故情要  
非重士

重士云何維邛令吉倦遊相如零落無術恭云謬恭恤  
豈虛恤

敬賢奚爲維趙宦賢忘爲舍人和璧乃全虛衷遠見廉  
頗之前

題茶陵侯傳

巨木百圍才朽成芝爰傳毛穎豈不昌黎惡以駭世空  
得姓施效其巧笑匪妍與媼以嘖誤人於戲退之

樓纜井序

明太祖破僞漢于鄱陽三斬樓纜投招陣亡戰士其魂  
魄依附爲厲能作風浪好事者遂傳爲宗氏三弟兄云  
云投詩弔之并辨其誣曰

鄱陽戰罷乾坤正濠泗真人受成命戰士多因浴日亡  
凱歌實自捐軀競凌煙他日繪將軍卒伍斯時意氣盛  
竈鼉窟穴蛟龍宮冑教漂泊爭雄性古人曾用矢招魂  
魂見生時用物存栖託精靈歸故國變通禮義聖人恩  
鱖鱸水戰資爲命樓纜波濤藉作根自昔制宜投赤水  
至今爲厲傍黃昏出没江湖載三百享祀舟師歆水客  
世遠淫巫造舊聞蠟污開國功臣魄悲君姓氏不能傳

聲響憐君尙翕赫滄海桑田君不知爲君徧告浮君白

神鴉 并序

君山左右有鴉百十爲羣船過必繞檣乞食饜飽然後  
去俗人神之稱洞庭君使者不敢彈射巫峽神女廟楚  
江富池鎮甘寧祠俱有之峽鴉宿石洞中楚鴉集祠旁  
林木

川岳神靈應正直祀典尊嚴有法式豈如水怪及山魃  
睥睨豚蹄喜熒惑來歆來格爲精誠獻諂馨香枉過情  
蛟龍唯諾龜鼉走聲響威儀滿洞庭不是羣鳥工假借  
迎帆送柁思醑謝習君傳會飽君誣眼見人閒不彈射

巫峽巖中楚富池亦憑靈爽結恩私青鸞恥共傳消息  
赤雀羞同刷羽儀俗聞此鳥惡且畏無端恭敬尤憤憤  
愛憎何不兩相忘人自揚帆鳥逐隊岸隱殘陽浪涌沙  
仰看初月帽敲裘渾無機械兼能飽鳴噪何殊他處鴉

枻木 井序

洞庭湖枻木不知沈自何時相傳龍首毛身色綠善鼓  
浪觸舟楫立破渡湖者患而神之稱爲將軍

艸莽宗生幸爲木況復干雲尺度足榷枻又是不易材  
宜知報答生成德不爲世用已孤負况乃潛蹤弄威福  
毛何爲者擬蛟龍靈何爲者走巫祝汝初定爲罔兩憑

罔象相逢又結朋出沒重湖角伎倆懶從匠石受斤繩  
深山大陸應慚愧展幹舒根錯用能長就輪囷卷曲體  
無過風雨蔓寒藤洞庭嶽瀆齊丕顯秩禮明禋須不覲  
風馬雲車颯往還何物將軍使偃蹇安得溫犀子羽刀  
光輝閃爍無深淺妖腰斬斷焚作灰風不離經浪歸典

龍場驛懷古

并序

齊魯謂之集閩廣謂之墟滇黔謂之場場有十二以十  
二支所屬爲名是場以辰日集故名龍場王陽明謫此  
不毛者山斷者水雨鎖煙籠莽千里負販何殊十一場  
能教過客低徊此此驛投荒昔有丞前馭燕雀作鷓鷹

後開窻窻張狼虎生面山川開幾層有明文運眞良苦  
條達成章君最古絕學千秋不敢知能臣一代還常數  
梁棟欹傾風雨祠龍龕空與結罟恩山雞不慣防行客  
挾子循牆飛起遲

白水

并序

在鎮寧州南二十里其流來自水西

自注  
夷名

至此爲石壁

所截漫壁建瓴下瀉其狀如簾壁間樹木掩映簾內偶  
爲風卷如拳幔然

虹霓落處振山響躍起雪花大於掌濛濛煙霧飛撲人  
寒暑陰晴迷意想由來瀑布迸山泉灑向長空幾千丈

豈知截斷水西溪浩浩教從峭壁仰晚日朝霞自外明  
蒼松翠柏從中長誰拏瑟瑟卷鮫綃時有颯風爲動幌  
下流流出怪無多咽入深潭何處往貪夫遂說潛金牛  
屏息終身操幹鞅嵌竇堪憐尙有棺魂今舍颺還依颺  
復有將軍不犒兵裹投馬革千餘鎚旋師息喘徒飛湍  
湏洞龍宮昧深廣存亡不計計鎚銖此豈君家內外帑  
滂沛難爲洗汗顏奔騰止可供心賞何當攜取置匡山  
使與廬山絕稱兩

象冢

乘象南夷昔戰罷象奴尸棄憑風化是物三更赴戰場

卷尸回上蒼山罅深穿坑坎窮其牙厚將艸蔓縱橫遮  
首旣南向土旣覆曲踞流涕頤交加至今此山名象冢  
冢荒象去山修茸嗚呼此象今若存春露秋霜尙遙拱

蝴蝶花

并序

叢生而有穗長數尺其花自下比次而上漸上漸密將  
盡尺許穗不復花日甫晚蝶亦比次而集其上蝶多穗  
短卽銜尾而綴於穗末及地始止人或驚起須臾復故  
蝴蝶會憐蝴蝶艸艸豈能知蝴蝶好聲氣何從解應求  
動植能通目擊道葉裏柔條數尺餘繁花漸密自稀疏  
青青盈尺還畱穗婀娜凌風有所須日斜花蝶相爲用

曬粉栖來穗無縫垂垂驚散魏收魂依依復接莊生夢  
市道神交各物情杜鵑花鳥亦同名開時鳥自啼流血  
啼徹花知月幾更

子規

黔楚西南接巴蜀子規逢人進忠告連天瘴癘地崎嶇  
非比他鄉堪託足春去能傷遠客心夜深尤易回哀曲  
不識君從羽化初至今勸轉誰馳逐世遠流傳事不詳  
山夷語我曾經目寄巢生子古不誣竭來尤惡傷其族  
玉貌摧殘帶羽毛性情未肯忘嫺睦飲啄茲山但見侵  
三年不到羈栖麓百鳥中唯有畫眉哺雛躬進青蟲肉

憐君卵翼向風塵周旋尙有良童僕四月聲長五月嘶  
哀號六月纔能續開明受禪事如何爾果無心戀黃屋  
口血何從脫躡餘淋漓苦訴飄零辱華陽國志好奇聞  
傳信總之非實錄蜀王能得幾多魂形骸今變彌山谷  
或似黎侯勸不歸無限從亡臣對哭

永昌棋

惜哉孔陵多楷木狼藉爲人作棋局若得周公陵上模  
零星定盡裁雙陸棟梁尙不得輕干恐被斤繩雕斲殘  
那堪污蠟充兒戲榾柮離奇一例看梟盧合用櫟爲刻  
五白將桴堊其色玉象收回博塞橈重輕名實纔相得

妙算無遺奕似秋每教志士錯葬頭方圓何不旋天地  
動靜移從山水求醉夢之中浪生死明臆淨几膏梁子  
聰明竊得等雲浮輕擲年光同逝水楚舞吳歌厭奈何  
深愁玩愒法無多心思稍費爭雄處兵法仙風不啻過  
別有天生穎異質歐枯心血攻斯術輕看身死重棋生  
藝就名成不能出祁寒暑雨總不知譜就真如百代師  
射御無能通小道遑思禮樂爲誰施其餘識未辨奇偶  
亦出機關事戰守相持善著費精神寢食俱忘規國手  
敗北終思一擅場何殊貧女銜紅妝著簪裙布忘羞澀  
玉釧金釵誤較量衛輝棋子少時見瓊玖圓勻明似練

只將擣紙事臨摹或壓牕風記書徧慈母嘗教罔得窺  
局終能事問何爲只今老去猶迂拙不解侵征與合圍  
聞說雲南產更好冬月溫和最宜老不霑暑汗響錚錚  
清音直出高齋表聞聲借問若怡情袖手從旁聽得明  
門前儻有鍾期過機械應嫌滿耳爭耳目玩好苦無厭  
驪珠入手碑礫賤對局人今尙永昌不知輕重何從判  
老夫百事昧幾宜鬢有霜華學道遲若解文章如博奕  
十年前已廢浮辭

永昌懷古

有明中葉漸失教記誦精工滿學校宰相書生不識經

扶持禮法時顛倒九重不解辨圭璋瓦礫迷離同與冒  
坐使貪人取砥硃殷勤拂拭欺廊廟兄終弟及有何疑  
同母無人及近支繼續必教如繼嗣孝宗當日豈無兒  
孝廟欲重稱作禰大行皇帝安從寘世宗萬一孝宗行  
豈得遙遙嗣純帝父母何爲不可尊他家天子作兒孫  
千秋傳會蒙譏刺富貴緣歸議禮門可恨呼號守丹陛  
賢豪自命才濟濟亦能據古亦引經不知起義空言禮  
徒多竄斥累朝廷萬里煙嵐自固扃漲颶隨波流入渭  
漣漪清澈不如涇君自牢騷失步履無端滅裂諸家史  
顛頓顏宜脂粉妝文章苦受琵琶滓蠻方不讀歷朝書

鄙俚還能眩小儒莫向竹頭與木屑禮明樂備問何如

自注故友張帖瞻嘗目楊用修學術爲竹頭木屑

產異

孕有常情乳有道孖與大期人世少生齒封題蕃衍祥  
汗牛一產三男表區家穉子得人情鼎足端居織女行  
衣裁白氎同長短耳著金環別弟兄鳥言夷叟偏多事  
聞我能詩請題賜老夫非敢重揮毫還欲詳披五行志  
竝乳嬰兒世俗禮先者稱兄後乃弟醫家奪理出強詞  
後來居上先成體弟兄行止必隨肩那得生初反不然  
毛裏旣然兄氣足會將顛倒讓兄先區家長子貌頗正

仲季顴頤各偏映可知未乳本相參後兄先弟非天性

寶石

井序

寶石出緬甸生沙水中初爲沙水所汨積垢如璞蠻人積蓄成丘名曰寶厥復治之以沙有映青映紅猶睛羊睛子母綠諸貴品

人生有地紆經濟地有人堪鍾靈異何爲玉石產紛紜浪向文章覓根蒂地不愛寶人著書豈非顛倒無聊計何曾黼黻得乾坤徒令梯航走遐裔瘴煙如墨日色黃蠻嶺彌天水沸湯夜宿怕魑投象窟曉行愁獾避羊腸舌人慇懃出歌舞寶厥歷落開倉箱粗沙取璞磨礱盡

異寶渾身的樂光萬貫千緡不論價權門貴戚交相訝  
瑪瑙何堪藉作盤琅玕未屑裁爲櫺豈無赭石屑同燒  
染入銀晶裂開炸新瓷劃去卽成痕屢鼎擎來終被註  
紅光閃爍青濛濛分別俱能自暗中貓睛電轉羊微睇  
母緣騰輝子起從蜿蜒負舟宜按劔翩翩有雀官彎弓  
憑君夜鬼能教哭文燄誰知白與紅

聶侯

世人教射只射的聶侯射法誰能加射手射眼兼射意  
襟聲裾影飛天花解牛末技何足數須知遊刃心良苦  
不然李廣浪得名盡人射石能沒羽只今七十氣何雄

寢處摩挲兩斛弓安得良家子十萬俱使穿揚射旋風  
我今壯志殊未已那復蕪頭老經史能事無過記姓名  
丈夫快意何須此會當盡取如椽筆剡卻鋒芒作弧矢

倒挂 井序

南粵小鳥也短翅尾項後稍黃喙與尾作淺紅色餘皆  
綠如鸚鵡狀亦相似宿則以一足更代懸於樹枝故名  
天天地地兮人以尊唯鳥與獸兮背負蒼旻能高翔兮  
吭引終俛首兮狂榛羈警兮鉤角搏矢兮猿蹲爾何以  
兮錯繆欲地乾兮天坤五采兮非翠一鸞兮誰珍豈言  
語兮階厲遠躑躅兮傷神天包地兮如卵俱旋轉兮無

垠何否兮非泰或屈兮成伸吾安知夫是鳥不直已而  
倒人

庚午除夕吳城南十里作

客飄颻兮中路歲崢嶸兮就暮俄六出兮紛拏復萬弩  
兮齊怒氣何噫兮天吁瑞安呈兮地素山與水兮不分  
舟與楫兮空具何柄鑿兮方圓心已猶兮未悟謂爐火  
兮無溫進椒糝兮弗御廬欽峯兮猶登蠡澎湃兮能溯  
惟世道兮高深羌躊躇兮窘步梅有芳兮松有枝懷東  
皇兮來何遲登瑤岑兮凝睇盈極浦兮凌漸頌椒花兮  
心愴悅敝帚焚兮窮焉往烏何墨兮水衣魚安罾兮蛛

網蘭壘兮蕙茶荃戶兮桂符邇予馬兮捷徑息我道兮  
窮途

濟寧懷古

天下睥睨之上皆有樓睥睨之下疏壕溝藉非李白與  
杜甫區區任城將何名勝雄千秋池幾許十樓廣樓何  
如堪俯仰天護天生詩酒才賓主池樓兩復兩襟懷白  
也素稱豪豪則眺望須憑高甫也稍近褊褊對煙波得  
澹遠下下高高會有因休言情興隨時遣豪與褊渺以  
茫又無許主簿賀知章不知先後來遊此抑或同時各  
擅場詩魂返不返酒意注滿眼汶水遠當樓如酌綠鑑

檻菰蒲蕭瑟柳垂陰日落風傳杜甫吟雕蟲才盡仍多  
病詩酒荒疎愧古今

寒夜讀徐文長白鹿表慨然有作

阮藉雖痛哭幾見途爲通景短風長積冰雪此時何必  
非天窮重憐深妬總知已況蒙聖主迴重瞳姑嫜冒說  
嫁衣好貧女休言裁剪空

失題

先我去者流水高山不可追後我來者聞風尙友知爲  
誰山鬼不識字蠹魚常苦飢風侵雨剝蒸成菌藏向名  
山空爾爲君若嗜痂我有瘡不來問道何傷盲四海之

十年到處名清狂，啾唧無蛩鶯不轉春山秋野何聲光。  
中郎書籍付王粲，論衡豈必偏收藏。傳家無限窮愁在，  
過半平分任選將。

風暴

俗謂狂風迅發者爲風暴，音如報復之報。

人憤懣感口嘯，天憤懣排山倒海狂。風暴人吐氣，天爲容。  
天外安得復有如許空，與天吐氣開心胸。大樹空深根亂石，  
無固蒂何況草蔓與泥沙。妄欲安然貼平地，日光尙被黃塵蔽。  
目力有幾多，還能洞徹隔手翳。不洗黃圖洗赤霄，滄江空望銀河沸。  
莫便向千秋緬想堯時羿，一元運會未當窮。瀕洞終朝必開霽。

戲贈貓

螻爲能伸先縮狙因善伺常伏矢將引後前飛袍取擊  
高下築獅貓不吼復毯毬隱隱深山虎豹才鼠穴驅車  
從泣別魚鯉彈缺爲歌來豈知自負從來默長技徒憑  
一不測處社穿墉慶更生公然狼藉重剽賊孰謂無聲  
勝有聲班爛欺罔得虛名爪牙不用君知否藏拙三緘  
是隱情

鷓鴣行

江上有鷓鴣高飛不貪黷朝往瞿塘遊暮歸灩澦宿清  
波淺水覓纖鱗飽外無求真自得漁家有鷓鴣苦被人

拘束并無鼯鼠能羽毛空翻翻顛倒出鯨吞滿勝不充  
腹盡力效鮪鱸祇餒鱒盈握腥穢日薰開饑涎流瀝漉  
復有鷓鴣病不禁鷹眼雖存背已秃無能出沒向波濤  
昔蒙豢養今遭逐蹭墜泥沙半死生江湖浩蕩空心目  
魴鱖將無反寄書過江欲慰枯魚哭

魴虎

魚能變化何不思成龍不爾亦爲鳥奮翼翻高空海濱  
雖廣斥吞潮吐汐皆砂磧暑氣朝含浴日紅寒光夜透  
臨邊白風從漏網吹來鯉驚竄漁鹽賣綃客魚無鬣龍  
有鱗鱗支鬣派非路人禹門一躍桃花春雜揉陰陽合

天地五風十雨期彌綸九萬里幾千里風背相衡言媿  
媿不妨直謂莊生狂汪洋恣論圖適已若道鯤何由化  
鵬不知助斥鷃扶搖笑搏起纔躑踔旋咆哮鱗悉禿而  
開爪涎亦嘆而獰毛瞠目此時看野馬不知爲氣爲波  
濤嗟乎惜哉爾魴虎變亂何文驥何武思謝鉤繩辭網  
罟緣隄設弮張巨弩搖尾何如暴腮苦肉付酸鹹皮寢  
處

艸亭先生詩集卷一終

艸亭先生詩集卷二

吳江周篆籀書著 後學翁廣平海邨編輯

門下後學俞鍾嶽覺齋校刊

五言律

雁

往來皆半載何客視吾鄉  
養子黃河遠傳家紫塞長  
哀因聲帶別勞爲道隨陽避  
雪謀秔稻從人謬忖量

題道院

韓康非賣藥不易到人閒  
豈爲芝田薄松林鶴未還  
路迷源水迴花落洞門閒  
聞道今宵月期君早閉關

舟次

江陰催日晚水涸計程殊天地教漂泊人煙任有無  
飲猿垂古樹宿雁旅寒蒲爾我同栖息更深幸一呼

臥龍岡

聖賢兼隱見世俗重勲庸不與天爭漢誰傳岡臥龍荒  
祠風蕭蕭古道艸茸茸若或吟梁父匡扶起力農

三曲港

綠垂兼抱柳紅俯一坳蓮卷幔憑香迴緣隄策蔭偏舞  
迴遊子席歌沸美人船此事從誰得荒煙野老傳

宿洞庭湖曉起

月迴終夜水星動一湖天客夢縱飛渡鄉關何處邊蒼  
梧時邈矣雲夢賦徒然利涉慚舟子揚帆破曉煙

湘君廟

吐日復煙吞魚龍涌一門靈旗開水府玉珮次雲根敢  
藉椒漿奠恭瞻竹淚痕重華不可見臣亦黯消魂

滄浪江

滄浪江上水流出滄浪山清濁從分別滄浪如等閒屈  
原何處去漁父至今還彷彿聞顛顛頓行吟歎乃閒

泊鳴榔港

浪花連雪白野艇倚雲翻擊汰思回棹藏舟幸有邨爨

邊分火燠煙際借厨殮敢謂宜謀醉無端憶一尊

雁

何方不飲啄也遠適荆蠻汝縱輕漂泊人寧忘往還黍  
禾秋秣馬劔戟夜連山兩載衡陽道看予鬢已斑

九月十六夜

假使蟾蜍蝕清光竟不圓支離萬里客悵望九秋天作  
伴兼無影驚弓反有弦如何一尊酒暗酌菊花前

子規

假饒君在蜀庶事不全乖妃妾填金屋纓簪滿玉階游  
魂安用變矢口自然諸何至啼殘血方知歸去佳

野泊

落景動松門移燒覓纜痕擔來沙有市船聚水成邨不  
夜應無夢唯天免斷魂自從虞夏晚漂泊幾王孫

代人索家書

近逢遼左客仗策問流民欲令求賢姪知依何處人百  
年雙淚眼萬里一孤身春雁從南返家書好細論

寄居

有序

寄居海畔小蟲也首似螻蛄而有螯身比蜻蛉差短而  
尾銳假羸殼而館之負以趨盤旋窸窣甚自得也然以  
此每爲人所玩弄因賦一律

庾信臨江宅傳爲宋玉居殺青非爾待生白爲誰虛容  
易稱流寓相將館棄餘泥沙不自守漫道屋渠渠

龍頭鰕

自注大者數十斤甲可作鏡

狐曾將虎詐龍或自魚飛汝并占鱗甲誰當任細微髯  
休虞見友綱每挂知幾抵眼看光彩然臍接曙暉

佛桑

自注葉似桑花似芍藥有五色

如來常袒裊天女不司蠶葉密看誰采花繁作偈參若  
將華采五飲出起眠三纓絡爲繰就莊嚴更滿龕

木棉花

自注高四五丈大連抱花紅如山茶治痢然唯土人用之他處不效其棉僅可藉褥

不堪紡織性最畏寒稍北卽死

始知吳楚產盡是艸棉花但得禁寒氣焉能爛曉霞俗  
醫收入藥工女罷移車憎愛非吾事難攜種到家

遊丹霞十首

并序

山在韶州仁化縣初無名崇正末李文定隱此以丹霞  
命之文定沒其弟鑑湖公歸家舍與澹上人建別傳寺  
焉

聞說丹霞勝幾同兜率天地從開闢有名未古今傳不  
是鋪金者焉知避世焉會偕蓮社友把酒問真詮  
語及冥搜事平生意最豪籃輿催豫備畫棹莫辭勞  
水連雲閣韶山夾岸高無心閒騁望留興覓禪逃

不解遊人意崩湍挾石尤大聲吹百丈疾力逆孤舟野

爨明漁火清笳暗戍樓無端成水宿新月漾如鉤

近縣

自注卽仁化縣

溪尤淺蟠根山更雄墟閒開罷市

自注越人賈易

處少實常虛故謂之墟多在大樹下

堰轉灌餘笳

自注笳灌田之具堰所以障水而轉笳者

問

法慙元度迎門愧遠公未曾離水次已覺此心空

彩雲千萬簇冉冉挾朝曦絕壁頽於染平坡翠欲翻人

空傳閩苑世實有祇園竹徑蟠松澄森森折到門

萬峯低在眼始信殿凌虛結構江山表莊嚴世界餘傳

衣還是紙

自注住持一紙衲係澹上人所傳

應供畧嘗菹

自注寺僧餐不設菜并無

鼓非此耽枯寂塵根何處除

蓮開千葉厚石戴兩池方深淺空中色交加無住香積  
來甘露滑擎入碧雲涼未必標雙闕金莖有許長

更期探絕境飯罷共登危風吼霞關迴雲開鐵鎖垂壯  
夫魂斷處病客力衰時賈勇攀援上爭先豁所思

誰言支遁老絕巘每先登色力真稀有機緣得未曾路  
迷全賴指事遠更能徵日莫憐疲茶相扶贈一藤

怱怱遊未徧若樣共言還峽贖虹橋迴巖餘錦石斑自注

虹橋峽錦石巖皆未及到夢魂依法界緣分落人寰畱語籬邊菊開

時再入山

脫帽

脫帽趁初酣開簾試一探青山殘雪界黑雨斷風含機  
少宜全息名虛亦嬾貪梅花繞茅屋今夜夢江南

燕

漫疑予是主往歲爾先來簾幙重相見鄉園尙未回祇  
尋栖賸壘莫問鑿餘坏風雨銜泥去花飛柳絮催

讀秦本紀二首

功德君何似金湯欲久傳若教延後嗣須是醉餘天孤  
立常稱聖貪權更學仙鮑魚無限臭未必亂千年  
天下何曾亂憐君力釀成棘矜除白帝黔劓舊蒼生試  
向金甌缺回看玉燭平不難傳萬世稍稍識持盈

重陽三首

浮雲不送酒何苦白如衣能引天涯目遙從鄉路飛誰  
家黃菊綻幾樹紫萸肥并入登高興晴光況滿扉  
去年當遠役茲日正長陰漳水浮梁斷黎城落木深怨  
咨分諷詠跋涉帶登臨令節幾孤負悲秋直至今  
興發難爲繼扶筇復閉關年衰筋力弱囊罄節文刪既  
不從浮海何須遠上山婆婆籬落下翻覺意閒閒

乙亥元日

文章真末技豈足答生成天旣容藏拙誰還敢近名寒  
暄彌老大豐歉倚陰晴及早求田去占年利耦畊

清明後二日詠雪

豈是清明過連朝食尙寒多應飛雪意來借暮春看艷  
爲穿花徑香因到藥欄流鶯不相借頃刻與啼殘

南閩

莫怪南閩地周秦總未通野航灘石漱官路嶺雲蒙秋  
盡偏無雁春深翻有蛩稍能消客況蘭茁荔枝紅

戲題焚剩詩稿

蓬飄幾萬里詩贖累千篇幸少驚人句教將小道傳秋  
蟲宵哽咽春鳥盡纏綿也說酬天地長林短艸邊  
從人乞少陵遺像

莫怪求方物壯遊逢入川少陵遺像在石碣艸堂偏與  
爾漫相識論詩慚有年南金不及處一紙遠摹傳

秋雪

清秋天欲雪不便太無端落日幽幽晚長風艸艸寒蟻  
浮無賴興鵲噪不情乾莫謂宜杭稻先霜作瑞看

傷指

捉刀傷食指將指代操持豈不從心使終教作事遲飄  
颺烏鵲恨反覆鶴鴿詩何日開顏面如今痛定時

謀生

謀生何用術嘆世亦須時北轍乃投楚東鄰空姓施水

涵敲柳亂風舉濕花遲未許春如此禁愁少一卮

窮

窮原無鬼送巧豈許人求不與新裝稱空和做帝謀命  
從通外立才向拙邊優耕鑿堪娛老功名謝徹侯

我憐

我憐花滿樹花笑我傷春酒泛消餘興詩吟損賸神纔  
香蜂鼓翅更密鳥藏身誰識根株苦經霜濯露頻

韶光

韶光何處過從不見芳菲病裏桃花落忙中柳絮飛泛  
舟尋宿雨立馬問斜暉可有春如線淹畱尙未歸

仲廟

仲廟得風乘揚帆早到能津當前日問堂及此時升碧  
瓦留雲薄青槐落蔭層猶聞從負米歡喜色親承

水竹

纖纖愁近艸簌簌喜盈盈疎散心如此青冥意得存幾  
針穿雨笋一縷結霜根除是桐花鳳思從借實殮

羅漢松

證得何生果栽成滿盎因亂枝結實地密葉現金身經  
誦無聲梵禪參不語真自來遊戲慣從鉢起蒼鱗

桃接李

反不稱連理根株久澹和迷花應謂此鑽核意云何村  
徑從茲少門生豈在多參商空一本日夜事干戈

聞砧

雨聲一何密砧響一何高身到淒涼境心分次第勞最  
驚歸國夢并濕遠征袍旦夕秋光晚風威利過刀

畫竹

清陰何自入疎影忽森然潑墨畱餘地抽梢未拂天閉  
門遺暑濕高枕受風煙記得瀟湘暮會從此放船

拋卷

埋頭爭尺才能事只斯編終日規千古知天假幾年利

名虛近佛情性野宜仙拋卷開簾幙春山送曉煙

復雨三首

原田宜密雨夢寐憶驚雷薄震殘陽影輕沾野燒灰人  
情愁大旱天意殆徐回昨日雲生處重噓石壁來

道□占候熟世□節文荒放膽交朋友冥心事稻梁出  
蘋魚戲水離畢兔收光何用憂天地淋漓意正長

天幾千古熟雨欲一時秋過矯愆陽枉纔當大火流凋  
殘非節候疎豁滌煩憂明日催詩月銜杯得似鉤

孤村

晚霞明遠嶺斜月澹孤村篷底遙窺幔爐邊未掩門今

年秔稻熟此處繭絲存敢謂開懷抱狂歌爛倒樽

對雪

好語重飄雪休催未到春拚將元髻鑷坐令白頭勻與  
爾稱同調借梅作友人誰能共花鳥潦倒競芳晨

青蟲

繭纔蛹蛻蝶卵復亂青蟲倏忽才情異循環種類同飛  
時忘艸露蟬日昧花風何獨鯤鵬化偏非大夢中

雲

一天遮不滿那許比愁懷日旣從穿漏風休與細排可  
知長夏結有愧積陰埋觸石徒奢望爲霖恐未諧

風

炎方溽暑秋鬱結出颼颼好雨但千里涼風能一樓幸  
蘇今日暘苦薄去年秋頃刻天應怒聽雷仰白頭

雨

急起收書卷烏皮几近窗水思邀岸鬪雷欲逼山降散  
鬱聲如此除煩勢少雙魚跳天地黑雨氣欲翻江

涼

只道蒼天意今年獨帝炎火星東退舍蔀屋北開檐螢  
漫當空熾蛩將使夢恬淒涼雖在眼疎快且深霑

五十

五十探詩法沈吟又七年才疎聊愜當藝曲儻流傳繫  
籍窮愁杪分榮雅頌偏若云宜近史遭際愧前賢

延平夜泊

月穿篷慘澹雨滴石淒清喜接干將影愁聽黯澹聲天  
時雖至治地險得稍平道與艱難會多憂不近情

喜人歸隱過宿次日回舟作

策杖憐春暖回舟泛早涼幔移過樹影窗入到花香荷  
擔歸田客催詩昨夜觴短歌吟不盡餘興滿滄浪

淮陰侯祠

通侯羞竝列市井辱無辭昔混風塵日今書竹帛時游

魚存舊瀨高鳥弔空祠不繫安危面千秋血食期

崑山

陸機不入洛名節更相關賴爾温如玉教人賣此山風  
流期接踵臺榭幾多間蔓艸何爲者秋枯春長還

謝友送牡丹更索異種四首

洛陽木芍藥濃艷已千秋過盛非天道宗生到亳州提  
攜標甲乙慷慨慰窮愁寧與繁華稱溪邊科白頭

得閒才盡後用拙道消餘賤不當憂世窮何苦著書爲  
君誅艸蔓莫我嚇庭除長者雖光寵衡門亦住車

土厚花當發園成室詎充何妨移我愛取次與人同分

滴研朱露教薰操縵風藩籬縱開拓亦未負途窮  
魏藥宜稱后姚花好擅王佛頭青絕少鸚羽綠良按  
譜嫌貪得追蹤苦病疴但逢神妙手圖寫寄滄浪

蜂

得喧芳樹暖爲趁彩檐晴香帶聲黏就甘和力釀成股  
肱勝採擇鋒穎賴和平穴蟻雖知禮聞羶舉國行

蛙聲

怒蛙誰重汝歷亂熟梅天水闊浦張網泥深村種田  
鷓鴣啼散處白鷺立開邊遺悶能攜杖何時聽寂然

槿

爰州榮替事莫令此花看妄意朝華久兼誇地力完根  
沾滄海潤葉取碧雲干我土惟籬落俱將若輩攢

品泉亭

自注在金  
山寺中

應嫌唐宰相矢口辨中冷霖雨誠三日恩膏浹四溟苦  
無深汲綆懶入品泉亭豎子偏多事歸舟挈幾餅

秋日懷竹林寺

擊柝驚蒼鼠招提護笋天路遙清磬引山轉綠陰旋小  
憩尋春客能逃幾許禪移牀宜此日豎坐菊花邊

畫魚

開卷波濤湧教子挂艸堂解衣槃礴裸憶爾對濠梁翻

藻憐牀濕吹花想練香垂竿人不見應恐遇文王

秋日雜詩八首

江上關心月秋來每預看今宵能學扇他日會成盤祇  
畏桐陰濕寧愁桂影寒浮雲暈不定鵲噪幾時乾

一天停午雨從曉灑如絲可惜黃梅過非霑赤地時屐  
泥登曲室簷溜沒高墀入夜知何似秋成實在茲

淮南一夜雨江北萬家魚無計拯胥溺何人任決渠秋  
霖今若此澤國復何如塵匣能開鏡無勞併炤子

半開花盡落不落亦微香白帝真無謂姮娥有底忙明  
朝連宿雨今歲失秋光敲枕聽瓴滴淋漓與漏長

已屆中秋節陰晴分不分日收行潦水雨灑過天雲辟  
世翻爲客依人更遠羣井梧何太早黃落亦紛紛  
秋能添月彩月肯負清秋不解連陰好空生幾日愁兔  
霜毛始潤蟾沒體還浮倒篋先沾酒光輝會滿樓  
破除幽興雨又自廣寒來炤室呼銀燭然蘆想畫灰遙  
思今夜裏可有處雲開露坐兄酬弟團圓對舉杯  
傳說方秋社吳淞沒稻田月休隨畢轉歲到有秋邊豐  
歉關心極簾櫳望眼穿金波相慰藉不在向人圓

露筋祠

高郵隄隱堞邵伯驛臨湍骨尙輕孤露祠寧重奠安佩

薰晴氣濕幃濺水痕乾淮海蘋餐盡非關一薦難

種竹

問誰重旅寓他日住山房見此王猷竹憐如召伯棠淺  
深看地脈生發聽年光勞勩先童穉提攜土一筐

嚴州道中

懷古山光好關心習俗分石灘重鎖月水碓遠舂雲書  
劍成何事漁樵尚有羣莫愁垂釣去未必動星文

解嘲種荔枝作

入晉栽蘋果遊閩劈荔枝輕紅開我眼綴碧朶人頤結  
實渾閒事成陰未可知蟠桃漢種得今或始花時

小飲

多年貪懶慢今日恰清閒  
薤艸心開徑移簾眼到山隱  
休論巧拙游不在躋攀  
小飲憑烏几羲皇俯仰閒

火燒灘

并難輕下箴非但不容撓  
終古流應斷當年石未燠  
噴  
旣寧易鑿頑梗漫辭燒  
與利長川涉兼將滄海潮

坐月

露坐仍流汗空瞻月性涼  
兔無消暑藥蟾有換形方  
何不蘇遺子翻令似暴疴  
科頭愁內熱白髮漫如霜

紫駟馬

是馬皆宜駿縱橫萬里行浪從神驥末忝竊紫駟名  
儻微才質馴良薄性情風沙聞緩急銜勒欲長鳴

團扇詞

終與秋風會從看夜月裁  
弃捐休寘念煩熱已除開  
玉篋塵教滿冰紈潔可哀  
芙蓉連水殿暑雨任重來

歷歷

眼昏難遠視莫嘆不如聾  
重聽儻相借輕看此發蒙  
許丞寧擇病阮藉已成翁  
歷歷傳書日聰明可願中

春雪

天雖嫌驟煖地不肯重寒  
終日蕭蕭集隨風片片殘  
生

機當剝復滋長更艱難只有青青艸俱將震露看

上元野泊

浮生頻有適令節漫相仍癖向年華老枯從閱歷能灘  
聲喧水樂野燒轉山鐙莫問金吾夜會弛禁未曾

烏石山

青霄疑咫尺烏石信登臨藏僻喧然內通幽徑與尋春  
回城郭起潮滿幅隕深分外明人眼浮雲澹古今

水口

水口晚休登人煙高百層郵籤安夢柝戍火照船鐙北  
向知無雁南遷聞有鵬颺風休湏洞中夜懶騫騰

乙卯除夕予舉一子命之曰除己巳除夕復舉一子以兄爲例亦名爲除而以大小別之喜而有作

付大除誦

大除除日產除夕小除生二子如能立茲晨與有榮弧將符竝設兄爲弟加名冒雪添新蕾江梅亦世情

送舍弟簡還家

來往只空囊琴書且耀裝一家俱道路儋石賣文章黯澹灘聲壯嚴陵山水長浪游殊不薄攜此急還鄉

得舍弟笈家信

秋來纔兩日書已到三函祇爲愁千結翻憐語大凡雁

休分漠野猿莫守山巖今古龍鍾淚時時坐滿衫

西施舌

沼吳非齒頰沿海足泥沙縱不生胥浦何妨產若耶唾  
餘珠剖暈霏剩玉烹芽羸蚌休言味東施早見譁

江瑤柱

畏人連甲取特長刺如林自信勝筵席空持謝釜鬻天  
機終古淺物患與年深羸蚌登沙水俱非貴比金

榕

不材非惡木薄海易成林天尙教生長人何諱息陰冰  
霜蒙見外斤斧漫相尋枯朽先容及同歸感激深

大除

早知斯木散錯望七年餘不若同子厲驚看半夜初既  
輕鄉曲譽復讀鄙儒書千里傳家信何由怒到渠

小除

兩兒俱繫念幼子最深思爲客無休日傳言久病時藥  
緘垂橐價夢授過庭詩何處心尤折家貧母過慈

悼亡

井曰梁家婦糟糠宋氏妻百年期黽勉千里惜分攜萍  
泛鴛何託松敲鳶自低諸孤竝頑梗未必解長啼

繁花

繁花已零落幽意未消磨多謝連雲樹分爲三歲枯葉  
稀寧受漑幹弱儻勝扶尙可將詩興蕭然醉日晡

蓮蓬人

粉紅零落盡芳蕙破除完莫問煙波致方登傀儡壇形  
骸慚土木束縛愧衣冠何用逢蘇代知君行路難

淮陰市

勇須論大小怯亦待躊躇不覺真心易相逢熟視餘爲  
天任治亂未汝屑驅除蒲伏榮闈闢高碑有特書

重遊金山寺

趁閒頻仗策乘興更移舸山滿寮相軋江分岸失遙三

吳故家木六代野田苗併入登臨眼羈愁豈易消

鬢葉

月臨湖慘澹雲渡岳低徊涕泗從教墮心肝無可摧天  
文南極迴地軸祝融迴鬢葉眞何物清宵聽幾回

輓徐處士

長眠天地外莫嘆不知晨世若非流水誰當作古人空  
餘三尺劍誰飲一杯醇芳艸無魂魄招回淚點春

衢州道中

此邦衣食計祇賴橘千頭紅映煙霞晚香傳澗壑秋亂  
餘纔有種凍後苦無收酸澀登筠籠年來媿徹侯

楚元王廟

以賢存祀典有漢幾宗親  
寘醴惟聞楚傳詩況自秦光  
榮淮水月狼藉闕宮春  
假館諸公客誰如申白賓

艸亭先生詩集卷二終

艸亭先生詩集卷三

吳江周篆籀書著 後學翁廣平海邨編輯

門下後學俞鍾嶽覺齋校刊

七言律

客夜

風入簾櫳燭影寒  
月迴睥睨柝聲乾  
梅花開否憑誰問  
竹葉清無欲盡歡  
潦倒幸從今世得  
支離須倩古人看  
頗饒河海冥搜興  
未賦關山行路難

臺城

金甌傷缺漫興哀  
清淨原非濟世才  
事業祇歸同泰寺

登臨空上雨花臺百年得失生前恨五夜升平夢裏來  
無那江陵開講處須臾文武又成灰

金陵

五口餘孽問何如可惜長城自破除幾度君臣勤遠略  
六州煙火盡丘墟流民已許蠲新稅燕子無勞覓舊居  
趙魏不唯思席卷登封曾欲到狼胥

金陵懷古

龍蟠虎踞只如閒廟算神功豈重攀最是風流小天子  
肯畱表裏好江山新亭自古空流淚胥井如今不汗顏  
獨有書生居事外幾回俯仰到朝班

咸陽懷古

山河自古壯金湯，瓴建何如立紀綱。  
不待李斯秦始皇，帝雖無張禹漢終亡。  
阿房故址空秋草，長樂遺基半夕陽。  
王氣不鍾兩陝久，縱然形勝覺荒涼。

南徐懷古

帶海襟江天地門，祖功宗德帝王孫。  
豈因建業非曹地，不惜咸陽有漢恩。  
更姓祇趨前代弊，承家遠讓季興尊。  
自注孔明稱蜀漢爲季興當年耕具畱祠廟，可與醫方艸共存。

閩越懷古

亡諸不過幸王侯，逐鹿乘時主一州。  
豈欲功名垂竹帛

恐從廷尉望山頭軍容止壯峯旗鼓氣終淹星女牛  
里開連雲問誰爲瘡痍徧地幾經秋

南粵懷古

秦鹿能分卽是賢何妨封壤此中偏論功應在蕭曹後  
遠害還居信布前椎結蠻方開左纛霓旌浦水下樓船  
縱然不及漢皇貴力闢荒陬自一天

金山

瞿唐峽起到蓬壺砥柱看惟此島夫開遍樓臺彌覺小  
結成鎖鑰不妨孤江聲海氣分襟帶水郭山城夾畫圖  
登塔幾回迷望眼淮陽魚鱉繭絲吳

夢筆山

漁竿昨夜夢生花  
鷗鳥今朝擁別沙  
山色送行歸到澹  
瀧聲畱向別人譁  
藏煙浸月俱從汝  
牧徑樵溪尙有家  
爲語文通休見笑  
周郎自昔少才華

焦山

松浮竹泛寺羈孤  
懷古探奇佛日晡  
江到末流重起障  
山彌近海易乘桴  
畸人曾受誰家詔  
逸事常教引重誣  
豈有一生深結舌  
知君魂夢與榮枯

寄題七星巖

昔年敲去復吹還  
鼓角星巖石窟間  
悲壯節宣輿地籟

瓊瓏控引氣機關曾聞禮失宜求野豈爲兵銷扇入山  
君到端州前借問幾時銀甕出人寰

山澗韜光作

遠浮仙梵出簾櫳亂撲天花下碧空滿塢秋聲春色裏  
經年雨意日華中沮洳隨地添泉派滴瀝分廚引竹筒  
流出六橋休見待芒鞋蠟屐興方雄

鐵牛

河流共說已東行力障長淮使合併蜃氣結來新白屋  
龍宮漂出舊蒼生桃花減水多開埧葦帚添堤迴護城  
蜀守刻犀猶厭勝鑄金敢不告平成

鎮江道中

兩岸晨雞送客行一天殘月曉霜侵關心江過金山寺  
快意帆收鐵甕城柳見故人思放眼鶯憐久別未聞聲  
歸家何事真堪慰散髮春風好肆耕

世事

世事參差老去休才微無夢到千秋窮通預爲祕雲惜  
飢渴還分宰輔憂人厭禰衡何作吏天憐李廣早封侯  
營營最是真心好物我俱忘任白頭

卮言

五十已過半月來熊羆無夢丹心灰潛夫有論自瀟灑

治安無策空徘徊海鶴舌存思一唳山花幹老羞繁開  
擺落宮商學漫興危言自此同嬰孩

十四夜對月

去年獨酌中秋月明日中秋酌向誰節物客中狼藉久  
世情老去斲磨遲蒼江白石雷霆峽玉露金風烏鵲枝  
何用團團始惆悵斷腸已是十分時

十五夜玩月

生計昏昏二十年不逢佳節忘天邊荒陬納履尋幽客  
勝地投詩弔古賢華髮鏡中秋亦半哀音笛裏月俱圓  
不知樽酒蘆花畔同唱吳歌幾釣船

十六夜望月

迢遞關山欲望難，絕無遮隔是冰丸。  
浴迴滄海鳥猶濕，轉出崑崙兔已乾。  
琥珀平時還醉倒，玻璃今夜況修完。  
匡牀側想淋漓雨，應爲愁人倦久看。

襟懷

襟懷慎勿愧秋風，敗葉殘雲掃不空。  
珠傍烏號應彈雀，文令鬼哭亦雕蟲。  
聽歌菊蕊娟娟俯，對舞盞花悄悄叢。  
漫道關山千萬里，醉鄉偏與故園通。

愛妾換馬

道路蒼茫好著鞭，愁眉笑靨艷神仙。  
嬌嬈未見鍾情過

蹀躞尤能使愛偏爲歷關山生絕足祇供歌舞負良緣  
未知掣電追風後暮雨朝雲何處邊

福州二首

十室資生九海邊非關逐末懶求田市胥壟斷還餘利  
里正催糧不問年著處泥沙鯉水族隨常飲饌膾潮鮮  
吞舟漫道堪羅網未必遊鯤許賣錢

乘桴應爲路多窮浮海寧知道便通澎廈島迴天在北  
女牛星外地無東能披若木真樵叟未掣鰲魚豈釣翁  
只好待乾清淺水徧從仙老問農功

武巨卽事

武丘春日買官茶半入私人阜隸家座上味休誇雀舌  
雨前樹最少蜂牙經無陸羽何消渴詩謝盧仝枉嗜芻  
寡婦雞豚香積酒峯迴溪轉吏誼譁

自注武丘山有三十六峯九曲溪

### 清流船

終世辛勤嘆長年縣中人滿不耕田輸租納稅桑麻外  
泛宅浮家劔戟邊并乏羊腸偏共挽縱饒犢鼻有誰穿

自注閩溪大都無岸牽挽最艱雖值嚴冬亦裸下體

酒酣翻問三江表可有清流

許大船

### 雜詩四首建寧道中作

萬壑千巖下急湍朝宗帶雨百重灘魚梁決破鯢鯢沸

水碓修成杵日乾無楫濟川誠不易有舟逆浪復何難  
滄浪慎勿還畱客噴瀑春容起壯觀

最苦陰晴晝不分一天錦繡接氤氳收書篷透驚風日  
曝背衣沾過雨雲就網買魚偏論價沿溪沽酒豈能醺  
鄉山莫謂殊天末酒舍漁船肯換文

笋尖玉版鬱葱長蓮子金丸的皦光捆載舟車唯是物  
貿遷日夜走他鄉徧山青滿春深籜傍水紅稀暑退房  
扶老斑斕還有杖龍鍾可許覲英皇

自注出蓮子笋  
腊及湘妃竹

霽景方期似畫圖滿山曉霧忽平鋪楓林醉失紅深淺  
竹塢寒虛翠有無勝事不邀人細賞短筇肯爲爾輕扶

瘴煙別去乾坤在，雙眼畱看范蠡湖。

泰和感舊

昔年遊寓得身閒，快閣蕭園最往還。  
更漏短長分韻外，風光深淺落花間。  
陶潛別去從爲縣，尹喜重來不在關。  
回首登臨沈醉處，幾多牧地采樵山。

柳田三首

自注：先君子避地南潯而築流寓嚴墓柳田祖基惟弟簡居焉然非先世舊業

矣客途憶及賦此寄示

萬頃湖邊百數家，耕漁艸艸過生涯。  
無山更覺天光淨，遠市能令世味賒。  
日出飯炊秔稻米，月明布織木棉花。  
年登不但饑寒免，比屋兼辭里正譁。

吾家先世水雲堂地背清流位面陽冠蓋盛時榮到里  
尊鱸思起樂居鄉滿畦雨露躬鋤過幾架圖書手校藏  
分付子孫此耕讀可無出處愧虞唐

五畝全荒三徑迷暮年漂泊自孩提養兒勿復懸弧矢  
作客今將曳杖藜鴻雁往來常傍塞鶴鴿飲啄不離溪  
搏扶實被逍遙誤逐隊何如歛翼栖

伏波祠

將軍顧盼儼當關古廟高開清浪灣掩映請看蠻瘴癘  
逶迤誰是漢江山沙明闌檻鳶鳥迹樹隱旌旗虎豹斑  
爲問畫圖諸將帥雲臺可復在人寰

周孝侯祠

俶擾清談蟻聚羣亂先骨肉  
聞公卿知用劉元海  
盜賊能嫌周使君折節威儀翮  
劔珮援枹聲響颯風雲  
欲除何害今鄉黨蠹短鯨長里正勤

可憐

自注荒亂後復  
遇火災長沙作

亂餘楚地非無材世俗淺見忘遠災  
比屋棟梁架青竹  
多年茅茨生蒼苔天道何曾示悔禍  
鬼物況復多嫌猜  
自注時傳  
有物爲祟可憐忍死忽變計相將頓足悲寒灰

江邨

江邨歲晚日昏昏天與愁人早閉門  
惟賴鳥聲知旦晚

莫憑酒力定寒溫雪應久積非關霰雲未浮空會有根  
好借息機藏我拙溪山深淺且休論

窮冬

大啟衡門淨掃階春光頃刻到茅齋停將竹葉杯雙手  
擘取梅花香一懷老去世情俱艸率凍殘天宇會和諧  
晨光不過寒如許短褐安能困吾儕

學書

學書迂拙不成名鹵莽荒原又學耕地力盡時通物性  
天心見處識人情冬葵春韭侯千戶周誥殷盤王百城  
獨往十年今倍切筆花頻夢繞鋤生

快談

浮詞曲說不須愁捫虱聽予一快談俗學能將才士誤  
寸陰莫遣腐儒耽畫來松栢何從古夢裏觥籌那得酣  
爲語鷓鴣且歸去扶搖風起欲圖南

壯遊

浪說衡門樂事稠此身須是老林丘乾坤無空思  
今古何人得廢愁蒿目時時看野馬萍蹤處處放虛舟  
扶桑若許觀風俗別有文章記壯遊

送遠

蘇武張騫總未經君行又過幾王庭江從白雪連邊黑

天向黃沙盡處青  
目斷雁鴻秋杳杳  
魂銷蝴蝶夜冥冥  
忘憂只是沈酣好  
蘆酒傳聞最易醒

過友人病中二首

憐君延客得人情  
路遠衝泥遣騎迎  
三月落花宜片片  
一天雨雪忽盈盈  
非關貰酒謀同醉  
爲檢新詩覓定評  
安道自須乘夜訪  
誰能畱興待清明

笑顏可掬應門重

重與童通

苔徑無痕盡日封  
狼藉一簾烹

藥氣飛揚滿鏡荷  
鋤容春田若樣宜  
栽秫秋稅如何是  
正供方法此時休  
見問還山自解作良農

掩卷

掩卷挑燈嘆古人庸流往往亦殊倫  
愛才莫道臨邛繆念舊誰知須賈真  
夢寐淺時思用世窮愁深處欲通神  
旅懷何事還搖曳月滿花香酒未醇

連宵

連宵無月到牕紗高枕江邨歎物華  
溽雨明知滋蔓艸漂風暗想落繁花  
晴光買得拚增價酒債償清許再賒  
聲響曉鐘依舊濕出門咫尺是泥沙

遣興六首

風恬雨霽雁初回艸淺泥融花漸開  
西第莫邀垂白老東郊欲覆踏青栢  
玲嶼歲月拌多病搖落乾坤愧薄才

撥棄牢騷舊題詠登臨重與出新裁

清宵十載憶林丘屈指天涯望斗牛越巒尚揮閩雁淚  
幽并還惹聽猿愁弟兄貧病知何似故舊音書斷亦休  
貢禹不彈冠忘慶王陽勿與善爲謀

滕王高閣俯郊關送客無風屢往還滿眼波濤撼南浦  
一簾煙雨失西山趨庭吾亦年方少遷次誰知鬢已斑  
屈首窮愁空有作干霄意氣杳難攀

叢臺驛畔古叢臺歌舞空興百世哀墜道嚙餘官馬艸  
雕梁焚墜野燐灰曳裾已後平原客脫穎宜無毛遂才  
豪舉一時經俯仰雄圖每飯與低徊

岳陽樓瞰洞庭湖此外還餘世界無遠引百蠻連赤縣  
參分三楚壯黃圖江山不論陰晴好舟楫其如日夜孤  
記得臨風頻輟筆空令屈賈笑菰蘆

滇南不復列星躔孰意冥搜亦惘然洱水漫傳蒙氏地  
點蒼空接漢家天子規魂魄依蠻樹孔雀文章鎖瘴煙  
萬里勝遊名浪得今將逾海種桑田

憶薔薇

水外垂楊水內桑招搖野色弄年光但開甕牖臨岐路  
未築泥垣蔽艸堂亂插薔薇資掩映結成籬落最芬芳  
寄書祇問家無恙違計枝條幾許長

吳錫五言集 卷之三  
憶吳甥園梅

勉注吳名爲  
且字救功

吳甥五畝園梅花常將春色供吾家  
出牆入牆樹疎密  
當面背面枝橫斜  
細雨未忍下簾幙  
長風多半縈牕紗  
安得此時念舅氏  
新詩共寄來天涯

憶亡甥手植楊柳

勉注亡甥  
卽吳救功

吾甥手植映蒼波  
門外垂楊近若何  
荷插昔年從位寘  
持竿豫說共婆娑  
幽姿不謂先蒲柳  
弱幹須爲禁斧柯  
莫使春深亦顛顛  
魂來無處可吟哦

齋後垣卽削餘山麓也甚逼而高  
芟去艸蔓藝菊  
數十本秋花盛開喜而成咏

欲得黃花映碧空，春前移植自籬東。  
頻攜未到登高杖，就醉非關送酒筒。  
壁立怕遭墮石雨，窗虛愛坐落簷風。  
題詩笑問淵明徑，可在天涯峭壁中。

席中折瓶梅

今夜銜杯興不孤，能將春信折來無。  
酒籌已徧傳瓊樹，詩思須收貯玉壺。  
傍榻風吹香入夢，依屏月畫影成圖。  
呼童汲井添新水，明日還堪醉老夫。

對鏡題桃花

春色何曾肯浪過，韶光無那忽蹉跎。  
麴頭竹葉傾將盡，園裏桃花剩幾多。  
有客折來從小巷，遣人分得最繁柯。

低徊對鏡看雙鬢與汝相形轉覺皤

荔子

荔子種豈從蓬壺仙家迢遞傳來無蔗漿爛煮寒水玉  
鮫綃細織珊瑚珠登盤涼未透胸膈落爪香已充肌膚  
可惜貴妃不解事半生摘取馳長途

渾忘

落花懶掃積層層可惜渾忘況可憎瓦雀啁啾捎蛺蝶  
網蟲跼踖伺蒼蠅未償酒價賒來好欲讓詩名老去能  
興發祇緣筇杖在名山春盡幾回登

掃落葉

秋風誰謂比春風氣象蕭疎愧化工艸木變衰宜落葉  
聖賢奔走類飄蓬冰霜歷盡材方老荒穢除開境始空  
只有舍人門莫掃恐疑魏勃欲求通

憶采菱

采菱壯觀昔如何興比觀魚較獵多潭沲縵連分水蕩  
敲傾缸露受人蓑幡幡摘過青銅鏡落落探從綠玉柯  
豈必尊鱸動歸思過雲滿浦此時歌

蒲簾

陳平昔日門懸席食邑因封戶牖鄉但使蒲簾禁得冷  
何如車馬爛生光紅塵到此飛回去紫燕來時捲不妨

敢爲貧寒清興別春山不遣入茅堂

題杖

不騎竹馬幾春冬霜雪侵凌總角儂誰謂據鞍生嬰鑠  
禮宜攜杖習龍鍾看花好醉過香徑採藥能吟上遠峯  
復欲與君後天老離奇勿化葛坡龍

攜筇

良辰誰那病中過強起攜筇捫薜蘿山到極邊忘結地  
水因近海不成河有猿下淚愁方減無雁傳書事轉多  
隔斷故鄉千百里丹楓翠竹意云何

病起

花時不飲太無聊一病輕將春事銷隨我力呼天夢夢  
憑人遠客路遙遙姓名誰見書能記隱遯寧聞賦可招  
只合攜筇尋酒伴典衣相與醉今朝

天畔

梅花天畔兩開春柳色溪邊久待人世不諳須似漆  
鬢毛且緩莫如銀吳山懶賦規爲畫越水無魚採得蓴  
莫取千秋好書劍相將終日歷風塵

題春秋經傳集解三首

并序

傳春秋者三家惟左氏爲腴贍然於漢初不得與公穀  
俱列學宮寘博士弟子至於今而左氏孤行矣注左氏

者不下數十家見稱者惟杜林二氏然林氏膚淺則又  
杜氏孤行於世焉著書豈易哉予家貧無書行年五十  
有九始購得春秋經傳集解一部慨然成咏題諸簡編  
時庚辰除夕前六日壬午

若爲皓首始窮經迴憶兒時涕泗零牧豕養肥書裏蠹  
飯牛飛散案頭螢空生閉戶蕭條白遑殺連車浩汗青  
卒業今休嫌老大豈無盲廢燦星文

傳經請看聖門賢耳食終身貫串偏袞鉞贊襄游夏外  
文章升降帝王邊風流掃地詩無用名教回天史有權  
只恐三餘自孤負癖如元凱莫求痊

公器將無取太多平南事業足消磨請看終古山同時  
直到澄潭水不波解甲歸仍思制作開函老轉怕蹉跎  
素臣相與孤行世得附青雲奈爾何

將修蜀漢書題陳壽三國志

遷固云亡失雅馴非徒史法沒荆榛一成有卽宜稱夏  
六國存誰肯帝秦不數偏安前代裔生憎黨亂著書人  
欲開地白天青面只在窮愁泣鬼神

艸亭先生詩集卷三終

艸亭先生詩集卷四

吳江周篆籀書著

後學翁廣平海邨編輯

門下後學俞鍾嶽覺齋校刊

五六七言絕句

山行二首

身在白雲中遙望白雲外  
初日少光華只到迴峯罅  
行到白雲外迴首白雲中  
山靈真醉夢亭午尙朦朧

淮陰釣臺

淮水嚴陵瀨乾坤兩釣臺  
鴻飛不可接鳥盡有餘哀

雜詩十五首淮陰道中作

淮黃俱傍海分合好朝宗到處鳴哀雁將無窟孽龍  
水溢隄須築隄成水更高帆檣凌雉堞廬舍仰波濤  
水從垣上減湖到海邊平安用分疆界猶存上下名  
譙門高幾許雉堞只如蹲郭外多堆土潮來塞縣門  
逃生塘埂內縛竹架菰蒲日夜須傾耳全家聽上湖  
種麥人家地新栽官柳枝桃花一夜水不復問公私  
青出如螺髻誰家高殿塋子孫漂泊盡蛙與上清明  
臨流春燕子終日坐枯槎莫飽織鱗後還思宿昔家  
傍海蒹葭迥沮洳百里餘漫言霜在眼備載歲修書  
寄聲精衛鳥木石滿山巖莫若填高堰滄溟再去銜

邨樹參差荇河隄，  
嬾娜繩紅顏工擔土黃口解挑醬。

自注

流民生業俱以築塘浦魚爲生

習熟生能事操舟網，  
怒濤比人多十石。意氣是漁豪，  
激越成無賴。清流嫁濁流，  
良非威可畏。萬弩射潮頭，  
丸泥人汗血。片石斗平金，  
宗慤渾無事。偏懷破浪心，  
沙土隄無艸。浮蘋炊不然，  
漂來經寸葦。比桂更堪憐。

水邨八首

星散不成洲，隨波三四漚。  
人生無繫著，非獨此邨浮。  
澤國謀生易，從來不聚糧。  
網收猶未曬，已換得黃梁。  
周防翻用水，寢處不離雲。  
殊異蓬萊處，洲坻大小分。

前人聞見小不識縣何名近爲輸漁課三旬九入城  
自昔謀衣食煙波止一鼠兒曹開知識結網睨鷺鳧  
蔽雨菱爲瓦編蘆亦禁風爲開懇關例佃與富家翁  
衡宇實比鄰聲稱亦至親只因隔帶水別是一洲人  
溫飽垂綸客安閒不易如莫將魚十石換記姓名書

剪刀股

并序

距黔陽若干里兩崖壁立中東一谿復有兩嶼上下截  
之舟入如井水激不得速下漩爲盤渦凡舟必隨渦轉  
若附磨然其轉周其險始脫俗名剪刀股  
盤渦入九地舟繞盤渦沿漩出盤渦口盤渦在九天

雷四首

或以雷辨詩見示內有雷既出地上氣散宜無聲之句因賦四絕句以解之

取竹擊虛空虛空應聲響何況佛郎機火乘藥力往  
疾雷何止火乘藥擊虛空顯氣彌天宇迴旋崩迫中  
何故地中雷深藏待雨觸君看石煨灰鼎沸須人沃  
爲霖三日後百里寂無聲舊氣俱宣泄新雷未結成

絕句九首

春色正平分花陰復亭午悠然曝背餘細憶勞生苦  
經冬半死蠅出穴欣欣集自古太平春人偏不知蟄  
藥丸曬已乾憶昨搗風雨錯用幾多愁無寒不和煦  
範土作錢攤勝負亦變色莫是兒戲中可以推物力

囊空無酒費拔劍且起舞行樂惜分陰非如醉可補  
百錢買佩刀常用千錢錯利鈍問何如光輝滿鋒鏑  
園丁奪天工熾火促花萼比及日暄和芳菲悉零落  
花落少人過香泥滿郊甸拋書高卷簾靜待吾家燕  
明年春未來往歲春已去今日有何方攫取春光據

晚泊

短景落行旌荒邨滿客程待霜千樹色流月一江聲

曉發

日出岸噓煙風生客放船蒼茫覓歸夢疑只在前川

婕好怨

宮中輦已卻篋底扇宜閒若望春風轉齊紈亦汗顏

昭君祠

寄語深宮內凭君絕世姿莫因恩幸晚羨妾作闕氏

高臥

高臥乘潮舫揚帆復嚮晨細聽雙耳水洗淨十年塵

觀奕

深謀常敗北浪戰復如何以我全無第羸君妙算多

碁

局終何處用先外更無機莫待分成敗方從論是非

午夢二首

午夢太無知故人別十載那見不飛揚還有窮愁在  
夢魂不我欺遠別亦何有此是素心人焉能與世偶

鴟鴞

鴟鴞聞魯國鐘鼓祀爰居亟命圖形像留分尸祝餘

卽事

白小狎浮蘋烏鴉集東楚一飽再三飛不是栖遲所

絕句四首

鄰家失敝屣相與擬匡衡誰鑿開東壁盱衡到五更  
光聚鐙加明堂竈燄影薄所以東鄰女不教同夜作  
穉穉語嘉蔬同生天地初年登君穎粟歲儉我扶疎

鏡不厭東施東施不厭鏡妍媸一有心毫髮起衡命  
螢

可憐寒不得欲與焰爲謀翻笑連城壁黃昏無處投  
渡

清晨渡頭去日晚渡頭還暮暮朝朝渡誰如渡子閑  
霜

白屋助寒威朱門增月采不知天地心氣候爲誰改  
題項羽廟

論功嬴氏未能亂卽宜王亞父教爲帝張皇底滅亡

漂母祠

茅屋一間存風爲啟閉門低徊長嘆息多半是王孫

鹽

轉致寧亡命貪饕肯讓財誰令功令密端自霸圖開  
無錫道中

久別佳山水重披古畫圖品題相待久草木不無枯  
重題漂母祠

自得王孫報俱懷漂母心但憐目下飯不換異時金  
題杖三首

老我太無端須眉映水看儻然未盡白持作釣魚竿  
天付鷹揚具人爲文武師遙知年過百終不假扶持

但說斑爲淚難分英與皇時時瞻咫尺步步謁虞唐

題王山人隱居

栽竹畱場受月尋花出谷逢雲只有山猿偷果更無俗  
客論文

桃源縣

落紅日望爛如霞流盡春光不見花應是漁郎前問後  
仙桃無復種山家

荒山

荒山夏月冷于秋玉笛茅檐抵畫樓絕似故鄉春色好  
梅花落盡柳條柔

放鶴亭

孤山春到草青青  
依舊梅花一樣亭  
雲表不難重下鶴  
人間只少少微星

壺關

西風昨夜到壺關  
寒透鷓裘客未還  
大塊太忙人太懶  
花纔滿樹又空山

廣州雜詩八首

存五首

苦求靈藥駐紅顏  
空向無生學閉關  
大鑿尙畱菩薩地  
葛洪自有道人山

隱之歸去已千年  
寧見無香上瀨船  
清節果皆隨地改

只須枯却石門泉

荷葉空傳好製衣  
詞人豪語事全非  
羅浮紙作山僧衲  
風韻曾看滿座飛

化生無過草間蟲  
作繭偏和雞卵同  
五彩忽成蝴蝶起  
漢宮團扇滿晴空

腐儒何物足平生  
片石端溪出老坑  
陸賈不知裝入橐  
千金空博使臣名

延平雜詠五首

逼除又在一天涯  
心逐東風西到家  
童子不憐封壤別  
膽瓶偏插早梅花

一山春色半山城每日單衣畫裏行寄語上元休過分  
好畱桃李賽清明

底事心慵醉叵羅從來妙舞帶高歌好花開徧無啼鳥  
寂寞春如錦繡何

有何燕語不能諳覓壘將雛意好參刻羽引商縈度曲  
此邦吾聽最呢喃

踏青蝴蝶負暄風淑氣全收土脈中草木性情禁不得  
競將嫩蘂續殘紅

聞棹歌

一重月外一重山山到溪邊月轉灣猶恐山深傷寂寞

沿流復照棹歌還

入江東界曉聞吳歌

吳歌裊裊起山前如帶如絲落遠天  
滿枕夢魂聽不極朦朧知是故鄉船

七夕二首

迢遞今年一渡河天孫應悔巧思多  
從今若乞人間拙翫麟書生鬢髮皤

銀漢迢迢好放船無端填鵲自年年  
莫非天上長材少未得中流語濟川

盆蘭

盆蘭雨過日茸茸不負滋培經歲功誰信移來從弃寘  
畫堂開罷去年風

荃蘭二首 并序

荃無脊而菖蒲有脊菖蒲冬萎而荃不萎有枝而被刈  
者蘭草也無枝而不被刈者蘭花也人知蘭花而不知  
蘭草知有荃而不知日以菖蒲命之也蘭草讓其名菖  
蒲竊其實爲賦二絕句

脊誰如劍歲榮枯軟弱青青孰類蒲試問昌陽與荃草  
離騷當讀百年無

蘭草當門刈有時蘭花滿谷絕無枝臨文莫被三閭誤

白首雞窗讀楚詞

風蘭

花開幽谷已離羣  
芳馥憑虛更遠聞  
豈謂世無乾淨地  
根荻欲得結青雲

二喬

自注菊名  
開二色花

周郎老去向東籬  
滿酌流霞享阿姨  
兩鬢秋霜忽相笑  
尊前若個是家姬

八哥

伯仲君家有幾多  
本支行次未宜訛  
爲通七子鳴鳩譜  
舉族從教喚八哥

素馨

劉隱經營只落霞素馨袅娜入民家嶺南忘却花因妾  
嶺北誰知妾賸花

一捻紅

麝脂芍藥捻能紅濃艷春情醉化工何故荔枝渾不解  
側生馬上進來筒

雉媒

耿介由來最有名陸離文彩復天生偏招同類投羅網  
叅養虞人幾許情

白鵲

慘淡君看蜀帝魂又隨粉蝶入雲根風塵不見人歸去  
收拾三更舊血痕

漫興三首

鴉鳴鵲噪本尋常底是人情費較量  
張竹作弓丸就土致令燕雀遠書堂

著得書成遠自將萍蹤豈欲壯奚囊  
傳人縱待千餘歲儻遇名山好易藏

欲築乾坤一艸亭下臨碧海上羅星  
焚香坐論庖羲易隙地俱畱種莫靈

題畫

吞花殊勝啜浮萍滿腹芳菲定不腥可惜呼童烹未得  
一屏閑殺五侯鯖

斷飲

只爭杯酒不爭名爲欲昏昏過此生斷飲不知非我分  
一宵兩夢醉烏程

冷泉亭

遊人若個肯忘情亭自能幽水自清假使此泉如我冷  
更教觸石靜無聲

山和尚

遠勝禪關是翠屏煙雲漠漠樹青青能言不羨頻伽鳥

無字誰談孔雀經

郭公

自注鳥名相傳  
爲郭公所化

夷吾不信信開方善惡應全昧短長滿戶尸蟲何似鳥  
營邱休笑郭淪亡

功曹

自注一名吐綬大如山鵠頭似雞時吐一物  
長數寸大如斗行必避草木恐其觸之也

襟期落落路行難榛莽誰真結綬看好處不能終白吐  
世人何苦作微官

牽牛

花開小笠葉披蓑帶雨穿風過薜蘿有暇不聞吹牧笛  
無緣那許問銀河

文官

文官果莫笑泥芹野老無由得獻君若使梁州深駐輦  
承恩儻亦拜將軍

宜男

此花不比暫開襟忘盡人間憂淺深可惜未曾教伯道  
至今恍惚憶天心

延平雜詩五首

桂花開過見迎春人日幾疑剪綵新翻笑故鄉花信窄  
一枝早晚只經旬

看花若個怕花開容易繁多早滿苔零落盡時重爛漫

何妨開向隔年回

短亭物候異長亭春到延津柳色青天象可能依月令  
黃昏著帽看參星

踏青蝴蝶負暄蜂趁葉尋花已過冬莫笑夏蟲難與語  
君知冰雪若爲容

一時開徧四時花分付東風語物華黃菊言秋梅破臘  
芳菲須剩與交加

艸亭先生詩集卷四終

姑蘇吳學圃刻

艸亭先生集旣於嘉慶庚辰春刻竣今復得今圖先生  
手抄編年詩二冊明威先生手抄詩文二卷其爲全集  
所未載者文一篇詩四十一首急錄付梓以附集末道  
光辛巳孟夏 鍾嶽 又識

艸亭先生集補遺目錄

銘一篇

文塚銘

古體詩

三十六首

天河

星文

地輿

星飛

分野

命術

射法

徹土疆

均土著

蘇東南

充緡錢

廣搜羅

致偏長

書公治長外傳

黔陽道中

蠹魚

途中雜詩十五首游潞安作

漫興二首

豫讓橋

瓦雀行

南池歌

今體詩  
五首

客從

病驥

廣州雜詩三首

艸亭先生文集補遺

文塚銘

戊申之冬周子客游旣倦將歸發書篋中得廢紙若干  
帙行者艸者抹者規者損者益者已去而復留者墨易  
者朱易者朱易而更覆以墨者乙者又者勒帛者污漫  
而可以意辨者不可以意辨者此子兩年所著文藁也  
夫使我文傳于後者實始事於此其忍棄耶遂卜地于  
崑山之陽以瘞之雖不用術士之言然三泐實匯天目  
蒼雲五湖之流以達於海松江以九峯勝九峯之勢自  
東而西至崑山而委蛇之氣於是乎窮夫水承蒼雲諸

流而山窮九峯之勝瘞之於此亦可謂無負矣或咎我  
好事文如有靈幸起而謝之銘曰壘壘者非筆之藏也  
熠熠者非劍之光也惟此山川安爾魂魄於無疆也

吳東里曰劉筆周文佳城鬱鬱相對風雨冥晦九峯  
三泖間聞鬼哭聲則文之靈也

艸亭先生詩集補遺

天河

雲漢果成河豈不澍爲雨借曰有物承若爲燦可取云  
是氣凝結應不異天宇如何向空青橫亘一白縷須知  
是積星非萬數可數高下不同天比次實相聚自註亦從遠鏡  
出君看瓠中犀亦整亦參伍錯落繫蒼蒼稠疊焉得譜  
愈遠光愈微稍近始共覩所以中晷然須女與河鼓昧  
者不足論昭著莫狎侮駕鵲可成橋乘查直至滸耳食  
笑夢餐稍勝亦良苦誰能向清霄拈目一來估

星文

的然者何物日月周天星奈何言無質而僅彰其形仰  
視止一氣應已同天青如火無木麗何所栖熒熒君既  
遠星舍星亦遠君庭有目不自信耳復安可聽從星視  
地軸寧得殊秋螢勿因不可接議論如楹筵星地兩相  
就比次從蒼冥此時星小大非意能綸經體大有形質  
豈止栖神靈自無適有者安往不毒亭何當叩南極縹  
緲超雲駟天老日把臂來往同郊垆

地輿

吾嘗疑大地亦是天中星莫言地最下地下天仍青假  
如天附地日月安從經置身向星中地無山河形區區

八表外君看唯四溟太陰本洞黑借日成晶燬取地準  
月窟何殊嫦娥駟地如起見借日彩能無聽俗言苦瑣  
屑至言愁逕庭不遇廣成子勿與談青冥

### 星飛

星宿有定數躔次無改更若向彼飛去此處應不生遷  
移已萬古經緯何分明既殞不復繁非如枝上英零落  
能再結而無虛與盈飛時必灼爍落處尤鏗鏘耳日至  
天道孰是有準繩化石初炙手盡日方堅貞自註俗傳  
星落爲石  
初時甚熱質亦  
甚輒久乃堅冷豈非無至有自氣成硜硜假如星果實  
地體安能盛塵埃挾暑氣被爍陽烏精所以多南向夏

月方遒征我寧自天謫久客遲歸耕詩成頻擲地誰謂  
成金聲

分野

地不止九州天唯廿八宿州與宿相準太倉一區豆自  
古占災祥某某以某侯銖黍不容殊似天有私覆華夷  
且萬邦休咎各推究彼豈別有躔有躔或賈賈臺灣今  
版圖朝鮮漢封堠度數豈隨時伸縮與地轉儒者必知  
天瞽史未盡繆恐不悉適然姑以此爲後

命術

前由一甲子不聞由逃名後跖一甲子無復跖橫行甲

子有前後由跖殊姦貞五辰與二曜何自求其情借曰  
必畫一立限天資生若云有運會命又無章程柝下豈  
足和伯夷未足清頹墮不污下發憤非賢英無情如草  
木易地形隨更奈何離三才爲人立定評父母別情性  
川谷殊虛盈稟受生長內在秦能秦聲悲君一家言化  
爲孤足鑄見人欲鼎沸專一難調烹何人驅小術與我  
求元精

射法

昔人看舞劒書法遂入妙子未從學射豈識文章要異  
事無殊觀領畧在所造目擊道不存語言空懇到射法

學怒先怒成矢鴟叫及乎釋怒時心仁面容孝角弓秋  
其柔春豈得過躁風情上下颺日光向背照地廣目力  
寬圃窄眼收眺下臨狼視胡上睨馬當竈獸側須背開  
禽左宜右菴處處取天參時時將地較君瘡橫引弓君  
肥前注冒太長曲促加身短卓立效挽強赴風流舉弱  
逞騰趨志正體直閒似未盡奧突兩臂力參差中亦東  
西倒羽突月未滿不過遣往告母爲取長殺飄然如撥  
權審固復奚爲渾如誦典誥欲速恐易終不得窺旨與  
見矢不見的的爲矢所罩見的不見矢矢與的相耀視  
矢如菽圓方似柄歸鑿尺短及寸長中卽傍邊微比及

舍楮初雖設還卻導始能直如弦巧拙無殊調有實非  
自天首尾不魚掉只此索黍權健過秋空鷁斂翼向將  
加百鳥斃一噪弓材豈漫生箭筈未易料截角問牛年  
枯澤在老少治膠如調飴液穢惹濕燥析木得分中投  
筋欲錯繡錯繡始拘糾分中不傾撓天地生成者山隈  
異水隩蒲柳固陷堅竹箭亦勁勦但恐受氣偏僅得修  
治巧登場非不佳覆繡必違拗于焉見性情自古列學  
校箭若止穿楊技纔稱可教飲食虎負隅寢處蝨懸奧  
車輪豈得殊山石亦惟肖如何賈大夫僅博妻孥笑

徽土疆

地勢南北殊治道古今異南人云井田見弊不見利持以問北人攘臂起言易封疆三代前大約平行地一自秦漢還所重不止義區區執一論利害何由備不觀江左右天文斗牛次非唯苦人滿原田等葬器輸輓無已時國用唯此寄誰能將寸金割裂作溝遂民固未可奪君亦胡忍棄嶺表山海懸庸蜀險阻萃幅員問如何奇斜不一致其間可井者千百而一二未聞殷周時徹助于此試先民曾有言什一賦使自若從徐兗未連雍轉豫冀名山大澤餘萬畝畧軒輕或如錦繡毳或如甌脫置或閒有人煙或井無亭隧一犁尙未窮兩目已莫記

祇失蓄洩宜非無灌溉智濬滄果距川循源直至委縱  
然天雨暘不見人勞動安在阡陌開不得復追議王道  
有近功令發已仁治從來不可同南帆北乘騎必若騁  
獨見千古終如醉

均土著

民稠生事艱智巧日滋長意計苦不足挾詐聲赴響強  
則入劫偷弱乃事欺罔風俗既習成無處用刑賞自昔  
晉宋衰宗社南遷兩達官悉從亾避亂民亦往從茲生  
齒繁繁華海內仰遊宦及行商移家就浩穰此皆能侈  
靡浮夸不待獎日夜與江河一下不復上行仁廢小慈

亟宜起矯枉因循再百世富室無寸壤目擊耳所聞經  
行萬里廣每歎古原田連天入草莽移人就土滿彼闢  
此開敞但能使忘遷何古不可倣度地置園蓋因俗立  
鄉黨泛泛浮江船碌碌通衢輻富者以族行貧者起負  
襁長治予暫勞欲教先謀養若言漢諸陵七遷皆勉強  
如何新豐縣雞犬無搶攘豪強徒關中當時定怏怏大  
計旣在茲何人敢云爽

蘇東南

六服不再分賦敢望輕重但願要荒人祇輸畿甸貢任  
土固有宜寧辭萬里送吳越緩輸將誰備賓祭用周官

三百六十倍今予俸必準往古行能移寸步動獨憐侯  
衛民食德不癢痛賦半出東南杼軸爲誰空民力且徐  
論會計須折衷豈知輸太倉倍蕪浮正供千錢轉斗粟  
無乃未合綜自註吳楚輸輓入京道途車船人力之費  
漕運而設者斗米不下千錢其治河築倉官俸吏糈爲  
尚不在此數若能足私家公儲亦充棟自註欲使府藏  
充足必自減漕  
始運

### 充緡錢

司徒善持計在盈天下錢比屋皆貫朽府藏寧空懸金  
銀世止此人無生生權悉使化用物唯銅爲能然源泉  
開混混滲漏除涓涓統九州贏絀課百歲後先但使著

以代不必標其年開劫及萬世永永相流傳假如漢唐  
宋鼓鑄無時竣厯數各數百富厚焉逃旃子或用權母  
後勿思更前非徒銘可省亦使尊之專良金淨若練煨  
煉如龍泉磨礱盡沙力文字成刀鑄所費倍所直始得  
長懋遷費仍歸四海錢日溢八埏何必禁盜鑄去蟻先  
除羶作奸既無利豪猾誰垂涎

廣搜羅

淺苾積千車使醫療百病和扁亦咨嗟愧面赤相映九  
重大藥籠就治不一性毒收蛇蝎偏賤采蕭蒿盛生長  
天地材短長悉當競待用無子遺功高劑神聖唐虞際

則遙漢代近可證濟濟武帝時使臂指已應茅茹旣彙  
征洩勃亦效命非才獨爲鍾實帝求之竟無端魏晉還  
日夜陘其徑成輪矩使方宜輒繩取正悔不使山林先  
就匠石訂受斲始萌芽氤氳免空凝英傑固有長長豈  
無偏勝性成情不移好專才亦聽網羅張一目那怪蜚  
鴻贖賢智鬱牢騷梟雄泄躑躅悠悠世俗談見面不見  
鏡某運經濟斤某執文章柄科名某不慚資格某相稱  
崇尚累百年精靈得無孕何必無一賢然後稱弊政

致偏長

琢桓爲躬圭詎非五等器當其琢未成公侯輯無瑞況

乃設莫邪責以貫革利多能如周公操未必失墜夔或  
能明刑龍豈迷黍穗尙不挾兼長夾輔垂衣治奈何後  
代賢經綸無不備朝工掌邦教暮善弊羣吏纒褻煙瘴  
帷復攬風沙響恩波縱似膠一投那遽醉何不使相習  
就近轉祿位去齊伯荆吳管晏亦勞瘁治事如治經因  
材復任意能禮勿說詩詰姦兵姑棗丞尉歷公卿分曹  
俾力致豈唯偏才成全才亦純粹千里龍有媒十駕驚  
無驥誰言駕與乘驅黃必歷試

書公治長外傳

言雖云心聲必藉氣爲輔氣出音韻宣又問所由取齊

齒不穿牙齧轉異喉咀譬如鼓八音從金珠自土分野  
儻偏頗山谷或散聚清濁于其間開口卽齟齬何況形  
骸窮如彼躡與齶自然不能諧吐商復吞羽鳥啣牛引  
脰寧與脣齒侶奈何苦傳譎皆云是言語猩猩以面稱  
鸚鵡因舌舉爲一體似人所以畧爾汝要非品物常可  
以類推許不過飢飽時發聲有愉楚耳治或過聰億中  
固其所譬從鳥馬鳴謂已班師旅持此問禽言恐無說  
以處木籥石爲簧出虛可能譜

黔陽道中

神仙御清氣何在非飄飄瓊宮去幾許可架升天橋石

磴雖凌空亦未近赤霄山巒肖物狀大塊豈待雕奈何  
所見小傳會松與喬不得偶彷彿造物真無聊

蠹魚

昔我見蠹魚不忍加殺扑憐從蠹蟻中粗知親簡牘不  
惜借文章寧復計綺縠何期務貫穿祇便便腹取粉  
飾身軀從鱗假色目欺我室無芸冠高野人服穿鑿無  
覲顏宛轉蕃宗族小慈破大仁長鯨尚顯戮假令脈望  
成未遽能辟穀況未識神仙搜討何不速罪案滿簡編  
奏當豈待鞠此輩悉誅除六藝始可讀

途中雜詩十五首遊潞安作

昨日故人別今朝別故人情懷有幾許離思相依因楊  
花卷如雪無風亦紛綸終然縈馬足偏不污車塵有役  
必十載萬里常一身齟存齟齒脫攝去枯髯伸有錐立  
無地奔走安歸真遙遙古高士俱是耕桑民

月落芻粟盡馬嘶向空櫪遊子束裝行回身燈再剔細  
雨不需泥何況露華晷彼向面上飛此從草根滴來往  
四方人鄉音各自析歌哭我不知總爲勞生激上古雞  
犬聞相望不相覓衰薄始何時生涯在遠歷

貧窮乃士常止足爲世則殺身走名利如何是終極忽  
聞同舍子呻吟聲唧唧妻子相對啼車馬帶行色問云

初罷官過歸就邙北假如任拜起尙欲宣筋力我今何  
所之迢遞事攀陟未知馬少游幾時足衣食

日色如臙脂光暉映人面馳驅令人老朱顏何處見僕  
夫善占候云是風欲旋不然三日雨滂沱灑芳甸旣無  
禦濕具風急止目眩擇病莫若輕狂飈或差善亭午塵  
蔽天呼吸哽在咽隔手不見山空幸天乾變

紅塵豈不飛總爲宿雨掃岐麥秀陵陂坳堂積行潦清  
風更趁人旭日況尙早野鳥啼一聲榆錢滿芳草古迹  
處處標模糊費追討傳信固足多傳會莫絕倒充其誇  
詡心何嘗昧醜好聊與一徘徊狐疑畱再考

夜盡向南行牽牛值馬首熏風拂面來纖月落我肘大  
道暗可循豈宜憑衆口行侶不自信隨入蓬蒿走彼意  
先爾迷是非何處剖地道尙未明天道復何有回憶出  
門時何曾背箕斗請予馬是瞻迷誤幸未久

神鬼無故常氣數有順逆順爲天地正逆乃天地僻效  
順神之靈效逆亦其責豈以神人殊漫然無黑白此水  
昔曾冰用脫光武瓦若論中興功宜爲佐命伯君看錢  
塘江萬古此潮汐有宋欲淪亾陽侯不設策

離立邯鄲道榆樹悉有皮憶昔荒旱年割剝無一遺屑  
食伐巨石處處集飢疲上官適徵入例爲刊去思今來

邢臺縣綠柳垂空絲萌芽復何往婦女爭提攜煮入熟  
糠乾比榆甘如飴乃知甘棠樹緩急非所宜

陰晴曉未分相對商行止及乎攬轡行日車已在已樹  
栖雲散煙石落雨餘水濃淡淄淄開淺澗混混駛亭午  
歷迂途避潦盤山趾登頓仗蹇驢敲斜出行李莫笑賣  
漿翁村醪妄稱旨未必市道交當厄有如此

不過東武關豈識陶穴義空讀瓜瓞篇翻爲詩人棄高  
下悉因山向背復任地各分雞犬曹亦置几案位其巔  
關畦壟其趾列市肆巨室縱透池無過加塗墍可見漆  
沮旁周初從此熾窮經不出門剖析宜無自

平生愛山居風塵空致羨茅茨意爲營松柏夢中翫非  
無蕭灑心苦被遨遊絆惘惘自粵還怱怱入晉甸雖多  
穴居民不與結繩見連天走沙磧岡巒不可辨何由向  
八荒借一容身畔縱然愧真隱亦得巢由半

我馬稍能行客騎跋不騁道遠山路危日落天風冷豈  
爲瘠趁起和鸞帶項領寸寸熱人腸步步躡君影過水  
必一噓見草更延頸違論濁與清不計榛和梗我欲驅  
向前徑穿鞭不整此非致遠才告君君未省

細細擣蠙珠入藥敷疥癬君言出方書恐未合和扁此  
時被磷磨當日飾冠冕小疾未見瘳翻謂不足選志士

心與傷俗人面有醜觸類悟始深卽事觀須淺但使榮  
衛和會見肌膚變寧復血淋漓長途行步蹇

未爲潞安客先憶潞安酒沆漉遜薄栢琥珀謝濃缶夙  
昔好鯨飲誼闊無好醜能忘上黨遙在醉中山久開懷  
望細傾遣悶期大斗庶以酩酊情塞此奔馳咎鶴裘不  
在笥金魚非我有生涯慣獨醒高歌只搔首

晉水不生魚良非清澈故何曾爲蛇龍江河改常度歇  
馬黎城縣僕夫請刀布魚堪佐午餐竭來得異數纖纖  
數十鱗再掩豆再露充庖違土宜恐非下箸處入口果  
如茶屢卻聞鯉步不如彈鋏歸復我鮭菜素

漫興

孔孟生秦代出處將何如  
亂極必有治心與天爲徒坐  
待漢祖出帷幄垂訐謨博浪用智免殊非誅獨夫晚年  
殆聞道屣脫成平初

春秋無管仲并不成東周仲也用齊桓功始高山巨子  
糾未君國射利非射鈎太子名旣正唐復混九州豈必  
藉魏鄭相與安金甌

豫讓橋

智伯稱國士宜不過如讓刺客報人知只有一骭麟血  
氣與恩私亦各有分量先後兩破亾俱是得其當奈何

千載下文致自命狀假以義士名萬口和以倡復有迂  
疏人議論亦高曠但責爲賢豪此豈讓所望唯此橋下  
水曾見讓用壯不妨爲左袒哽咽日東向

瓦雀行

雞舐餘梁雀起啄朝飢不忍忍齷齪童子彎弓欲射時  
心手經營失把握卑戚由來最善驚箭雖空過俱飛鳴  
雌雄相慰蓬蒿上回首雞栖復有情

南池歌

濟寧城下南池古地上酒樓勢飛舞樓曾李白醉春光  
池亦秋涼吟杜甫李杜千秋不易才任城何事俱爲來

揮毫鵲落如千首對月鯨吞幾百椽女牆空取池樓障  
池上樓中實相望山川精爽不消磨呼吸通時定翻唱  
誰言李白血氣豪雲浮富貴名山高誰言杜甫襟懷窄  
朝廷數會中興阨古人嘖嘖適機宜肯從醉夢教李白  
少陵豈不登城頭李白或曾池上遊白也樂天甫憂世  
智當樂水仙居樓酒客詩人日踵至沈酣必作龍蛇字  
小摩卷石大鐫碑欲與李杜爭形勢我今衰老不堪傳  
多病兼無詩酒緣但爲追憶開元盛睥睨乾坤各妙年  
知章狂客宜畱士許簿何人亦愛賢

客從

客從疏柳過指點絮飛揚  
跬步教移疾肌膚恐撲傷  
況當春月晚更值午風狂  
歷亂彌天宇輕盈滿水旁  
桃空傳蹟面梅實點新妝  
豈可同亾命無端越巨防  
守身聞執玉舉足戒垂堂  
賢聖持膚髮朝廷渴棟梁  
但深開燕幕休聽遠鶯簧  
愁殺他家宴前溪舞袖長

病驥

耳銳目仍方毛疏脊漸瘡  
馴良時自惜蹠踐意空長  
信有真龍種寧無病乘黃  
誰憐弔形影伊昔薄騰驥  
熟識擒生地時登較獵場  
縱橫驚將帥顧盼得君王  
一決迴鷹隼長鳴感雪霜  
來從西極外忍棄大途旁  
所養心今

怠驚駘志漸張朵頤新刈草乾沒舊分糧迴立神孤往  
徐行氣不揚塵埋金錯鎧泥染舊絲纒不望重追電翻  
嫌嬾服箱浪傳宛苜蓿偏植漢封疆實與牛同阜虛疑  
豹共藏房星光慘淡我欲問孫敷

廣州雜詩

山海周遭抱奧區輕盈瘴癘畧堪虞風光占斷春三月  
冰雪渾忘地一隅

颶母猖狂落日低元軍歌吹趙孤啼空畱蜃氣開宮殿  
未必潮聲助鼓鼙

江有珠名玉有嵐屋多鐵力筋多相象牙邊璞方裁箸

瑋瑁零星尙鋸簪